



Oleh **Noor Mohamad Shakil Hameed**

Protes jalanan dan kepentingan individu

Setiap negara yang bebas dan berdaulat ada peraturan dan undang-undangnya sendiri. Maka sebagai sebuah negara yang bebas dan merdeka negara kita juga memiliki undang-undang tersendiri yang perlu kita hormat dan patuh supaya dapat terus hidup dalam suasana yang aman dan damai.

Mutakhir ini timbul semula pujukan, rayuan, gesaan dan ajakan kepada rakyat untuk turun ke jalan membuat perhimpunan dan mengadakan demonstrasi haram hanya kerana tidak berpuas hati dengan keputusan mahkamah. Ini adalah perkara yang cukup serius dan ternyata bukan kali pertama berlaku. Asalkan ada saja perkara yang tidak memuaskan hati mereka akan terus turun ke jalan untuk memprotes dan menyusahkan semua pihak.

Kelompok ini dilihat secara berterusan bukan saja mencabar dan tidak mengendahkan malah semakin rakus mencabuli undang-undang negara. Matlamat menghalalkan cara dilihat menjadi pegangan dan amalan sege-lintir rakyat kita yang meletakkan kepentingan diri dan keluarga mengatasi kepentingan umum dan negara.

Apa yang lebih merisaukan ialah kelompok ini begitu bijak meraih simpati daripada masyarakat dengan kata-kata yang cukup manis dan indah sehingga mampu mengumpul sebilangan besar pengikut tegar dan setia yang hanya mengikut saja segala arahan tanpa mempedulikan kesan dan akibatnya dan jauh sekali menghormati undang-undang negara.

Apa yang lebih menyedihkan ialah apabila kanak-kanak, golongan belia dan juga wanita turut diheret bersama dalam perhimpunan haram dan protes jalanan yang jelas bukan saja membahayakan diri malah boleh menghancurkan masa depan mereka. Bayangkan anak kecilyang tidak berdosa dan tidak tahu apa-apa diheret sama untuk berhimpun dalam panas dan hujan. Golongan belia yang sewajarnya memberi tumpuan kepada kemajuan pencapaian akademik dan kerjaya juga dilihat mudah terpengaruh dan sanggup memperjudikan nasib dan masa depan mereka.

Apakah mereka lupa tindakan mengadakan perhimpunan haram, protes dan demonstrasi jalanan di tempat tumpuan orang ramai bukan saja menyusahkan peniaga dan pelancong malah turut mengundang pelbagai situasi yang boleh mengancam ketenteraman dan keselamatan orang awam. Bukankah pihak berkuasa

bersedia memberikan kebenaran untuk mengadakan perhimpunan dengan cara yang betul, di lokasi yang tidak mengganggu orang lain dan lebih selamat di bawah perluntukan Akta Perhimpuna Aman yang bertujuan membenarkan warganegara menganjurkan dan menyertai perhimpunan secara aman dan tanpa senjata.

Persoalannya kenapa masih degil dan secara berterusan mencabar undang-undang negara serta mengancam ketenteraman dan keselamatan orang awam? Kenapa tidak mahu menggunakan hak yang diperuntukkan dengan jelas dalam akta tersebut. Ini membuktikan mereka sememangnya mempunyai agenda lain yang tersembunyi di sebalik perhimpunan haram seperti ini.

Realitinya kalau tidak berpuas hati terhadap sesuatu perkara misalnya tentang keputusan yang dibuat oleh mahkamah jangan lupa masih ada saluran yang boleh digunakan untuk membuat rayuan mahupun protes. Kenapa tidak mahu menggunakan saluran yang betul yang sudah tersedia? Jangan kerana hanya apabila sesuatu keputusan itu tidak memihak kepada kita lantas kita menuduh sistem undang-undang dan kehakiman negara tidak adil dan zalim. Ini sikap yang tidak adil dan wajar sama sekali.

Apapun masih belum terlambat untuk kita meletakkan titik noktah kepada isu seperti ini. Kelompok yang degil ini perlu bermuhasabah diri dan segera berubah. Sudah-sudahlah mengheret rakyat dalam permasalahan peribadi. Banyak lagi perkara penting yang perlu kita fokus dan tangani demi kemajuan rakyat dan negara. Tidak perlu membuang masa dengan perkara tidak berfaedah seperti ini.

Dan penyokong tegar protes jalanan juga perlu sedar. Fikir dulu sebelum menyokong dan bertindak. Teliti semula apa yang sedang diperjuangkan. Apakah kita sedang memperjuangkan hak dan kebenaran seluruh rakyat Malaysia ataupun hak dan kepentingan individu tertentu. Ringkasnya tanya diri siapa lagi penting, negara atau individu?

Pokok pangkalnya hormatilah undang-undang negara. Jangan sewenang-wenangnya mencabuli undang-undang negara yang selama ini menjadi tulang belakang dan asas pembentukan negara serta membolehkan kita hidup dalam suasana yang aman, damai dan tenang.